

Gayong Pasak tidak akan buat rayuan

PENCAK / SILAT
GAYONG Pasak, sebuah jabatan silat Persekutuan Anak-Anak Sandiwara Angkatan Kesenian (Pasak) tidak akan merayu kepada Persekutuan Silat Singapura (Persisi) berhubung dengan hukuman yang tidak membenarkannya menyertai semua peringkat pertandingan silat di dalam dan luar negeri selama tiga tahun.

20 SEP 1985
Sebaliknya, pertubuhan itu telah menghantar sepucuk surat pada Rabu lalu kepada Persisi untuk meminta penjelasan mengenai butir lanjut hukuman dan hal-hal yang berkaitan.

Menegaskan pendiriannya, Pengerusi Dua dan Guru Tertinggi Gayong Pasak, Encik Hussain Kaslan berkata pihaknya memang tetap tidak berganjak dengan keputusannya yang dibuat dua hari

selepas pertandingan Olahraga Pencak Silat Ogos lalu.

"Seperti yang saya katakan dulu, Persisi ada menghubungi kami untuk mengadakan perbincangan sambil menonton video mengenai peristiwa malam akhir pertandingan silat itu.

"Tetapi sehingga hari ini masih belum ada jawapan. Yang peliknya, Persisi menjatuhkan hukuman terlebih dulu sedangkan rundingan yang bertujuan menyelesaikan perkara itu belum diadakan," kata Encik Hussain.

Tiga perkara

Menurut Setiausaha Satu Pasak, Cik Isiah Majid, terdapat tiga perkara terkandung dalam surat yang meminta penjelasan dari Persisi.

Pertama, mengapakah Persisi menjatuhkan hukuman tanpa ada sebarang bentuk perbicaraan atau pengadilan.

Kedua, hukuman yang disampaikan seharusnya lebih rasmi dengan besertakan laporan keputusan dari pihak Jawatankuasa Lembaga Disiplin yang ditandatangani oleh pengerusinya.

Perenggan yang mencatatkan hukuman juga haruslah disusuli dengan frasa-frasa yang mengolah lebih terperinci butir-butir hukuman.

Ketiga, janji yang dibuat oleh anggota Persisi kepada dua orang anggota Pasak untuk menonton rakaman video Pesta Silat haruslah ditimbang.

Sidang Jawatankuasa Tertinggi Persisi yang diadakan pada 15 September lalu memutuskan bahawa Gayong Pasak melakukan kesalahan yang menjejaskan prestasi dan kemajuan silat di negara ini dengan memulaukan upacara penyampaian hadiah.

Persisi menjatuhkan hukuman bahawa Gayong Pasak tidak dibenarkan mengambil bahagian dalam sebarang pertandingan silat selama tiga tahun bermula dari 16 September lalu.

Gayong Pasak, bagaimanapun, boleh merayu kepada Persisi dalam tempoh 14 hari.